



FOTO: MILENA EHRENSPERGER

*René Georg Moser e Silvio Gruber: dus dals iniziants da la butia Sinti a Cuira.*

## NOMADS SUR ILS CUNFINIS

**Z**ighinghers, vagants e mulets – quai èn ils plets che jau hai chattà en ils vularis rumantschs per numnar quests pievels da nomads che passan dapi tschientaners tras las cuntradas da tut l'Europa. Igl ha dà temps e lieus nua ch'els eran reconuschius e bainvis, ma anc pli savens hai dà per els

malvulientscha, persecuziuns e mort. Er en Grischun han els purtà per tschientaners lur products e mastergns manuals d'in lieu a l'auter, da chasa per chasa. Els gizzavan cuntels e cuntshavan padellas, els vendevan da tutta sorts utensils, martgadavan chavals, preschevan il futur e sunavan lur melo-

dias. Ma er qua hai dà persecuziuns ils onns 40. Ins ha prendì davent ils uffants ad els, blers èn vegnids mess en psichiatria, exempels per ina repressiun incredibla davart da las autoritads da quel temp. Restads èn resentiments da grond'ingiustia e disfidanza generala tranter il pievel nomad e la populaziun stabla.

Ina gruppetta da Sintis ha decis da chattar vias e modas per superar la ignoranza generala ed ils pregiudizis davart lur cultura. Els han avert ina butia en la citad veglia da Cuira nua ch'els preschantan e vendan lur products e nua ch'ins survegn infurmaziuns d'emprim maun.

Silvio Gruber è l'iniziant e manader da la butia. El, ch'è stà per trent'onns en gir per l'Europa, vul prevenir che lur mastergns e tradiziuns gajan en emblidanza: pertge che lur tradiziun è degna da vegnir trasmessa e mantegnida.

René Georg Moser è chanaster e venda qua ses chanasters, Vassilios Grammenidis è l'ami che vegn da la Grezia, Illari Moser fa cliniez da tempera indiana, Heli Birchler crescha «cudeschs averts», Nuni Gruber chanta ed è la cuschinunza da la gruppa. Arno Black è il «schaman». Sustegn retschaiva il project er da Walther Lietha, librarist ed antiquari.

Questa gruppa organisescha er visitas en scolas: per che la proxima generaziun possa emprender d'enconuscher ina cultura da gronda tradiziun e fascinaziun. *Anna Ratti*